

সব পলিটেকনিক শিক্ষার্থী বিক্ষোভে

নিজস্ব প্রতিবেদক

১৯ মে ২০২৫, ১২:০০ এএম



ছবি: সংগৃহীত

ঢাকার সব পলিটেকনিক ইনস্টিটিউটের শিক্ষার্থীরা হাইকোর্টের মাজার গেটের সামনে বিক্ষোভ কর্মসূচি পালন করেছেন। গতকাল রবিবার দুপুরে তারা এ কর্মসূচি পালন করেন।

UNIBOTS

কারিগরি ছাত্র আন্দোলনের কেন্দ্রীয় প্রতিনিধি ও ঢাকা পলিটেকনিক ইনস্টিটিউটের শিক্ষার্থী মাশফিক ইসলাম বলেন, ক্রাফট ইনস্ট্রাক্টরদের জুনিয়র ইনস্ট্রাক্টর পদে পদোন্নতি দেওয়া-সংক্রান্ত হাইকোর্টের রায়ের বিরুদ্ধে করা আবেদনের আজ শুনানি ছিল। আশা ছিল, আদেশটি বাতিল করা হবে। কিন্তু হাইকোর্টের রায়টি স্থগিত থাকলেও চূড়ান্ত আদেশ আসেনি। পরে আবার শুনানি হবে বলে জানিয়েছেন অ্যাটর্নি জেনারেল। এতে হতাশ হয়েছেন বিক্ষোভকারীরা।

মাশফিক ইসলাম আরও বলেন, পদোন্নতির আদেশ বাতিল করার পাশাপাশি দ্রুত শিক্ষক নিয়োগ দেওয়ার কার্যক্রম চালু করা উচিত। পলিটেকনিকে এখন শিক্ষক সংকট রয়েছে। অনেক প্রতিষ্ঠানে অতিথি শিক্ষক দিয়ে শিক্ষা কার্যক্রম চালানো হচ্ছে। এ পরিস্থিতিতে পরবর্তী সময়ে কী পদক্ষেপ নেওয়া হবে, আলোচনা করে সে সিদ্ধান্ত নেওয়া হবে বলেও জানান তিনি।

ছয় দফা দাবিতে বেশ কিছুদিন ধরে আন্দোলন করছেন পলিটেকনিক ইনস্টিটিউটের শিক্ষার্থীরা। এসব কর্মসূচির মধ্যে ছিল শাটডাউন, সড়ক-মহাসড়ক ও রেলপথ অবরোধ। তাদের ছয় দফা দাবি হলো- জুনিয়র ইনস্ট্রাক্টর পদে ক্রাফট ইনস্ট্রাক্টরদের ৩০ শতাংশ পদোন্নতি কোটা বাতিল, জুনিয়র ইনস্ট্রাক্টর পদে ক্রাফট ইনস্ট্রাক্টরদের পদোন্নতির রায় বাতিল, ক্রাফট ইনস্ট্রাক্টরদের পদবি পরিবর্তন, মামলার সঙ্গে সংশ্লিষ্ট ব্যক্তিদের চাকরিচ্যুত, ২০২১ সালে নিয়োগ পাওয়া ক্রাফট ইনস্ট্রাক্টরদের নিয়োগ বাতিল এবং সেই বিতর্কিত নিয়োগবিধি অবিলম্বে সংশোধন করতে হবে।